

中國方志叢書·華中地方·第三九二號

據

清·劉元熙修，李世芳纂
清嘉慶十七年刻本
民國二十一年重印本

影印

四川省

宜賓縣志

(一)

成文出版社有限公司印行

序

叙古棘國地也漢屬犍爲郡梁名戎州宋改爲敘至明初始設郡守宜賓舊號義賓爲附郭之首邑我

朝醇洪鬯之德豐茂世之規仁漸義摩風俗不變即有地襟番民莫不陸讐水慄奔走來賓盖蔚然稱盛治焉辛未之秋余奉

命來守是邦適

制府

奏脩四川通志檄下府廳州縣徵獻考文各勤採輯宜故無志書其風土人情山川草木僅附載郡志中豈莅是邑者之因

陋就簡乎抑纂脩之難其人耳西江劉君元熙以名孝廉權
令宜邑商同衆紳士提要鈎元殫厥心力不數越月而志先
告成將付剞劂呈

大府而問序於余余維邑之宜志尙矣周官外史掌邦國之
志即今之郡邑志是也叙轄廳二邑十一宜賓以附郭居首
尤當有傳信之書備載其事實而可等諸華黍由庚之徒存
其名郭公夏五之第闕其疑乎況夫南富隆屏邑於江之北
也慶高筠琪長興邑於江之南也他如設馬邊以資保障分
雷波以捍邊陲高山大林界連滇省犄角之形宜獨當扼要
處此疆域宜志也水則一從錦城東下一從馬湖西來合流

入江由渝城過夔門而出峽宜又高居上游以制其下此形勝宜志也若夫星野之分戶口之盛賦稅攸關國計學校以育人才闡潛德之幽光表貞操於閭閻以及名流逸士薄技微長悉宜分門別類以志卷帙其不可率爾操觚審矣今幸是書之成也考核無遺搜羅罔缺上貢

天子採入輶軒以宜邑之風土人情山川草木並得附於直省全書以廣

聖朝稽古右文之化而風諭衆庶豈不休哉余故樂爲之弁其首旣以美劉君之淹雅亦以見諸紳士之勇於趨公也是爲序

嘉慶十七年歲在壬申季夏日

誥授朝議大夫知敘州府事永嘉張瑞溥撰

宜賓舊文物地也明天啟後屢傷於寇故氏族稍就淪喪嘉慶辛未余攝縣篆至即訪求志書縣故無專志僅府志中附存數卷紀載荒畧覽之增慨蓋成於康熙丙寅之歲傷痍甫定文獻闕如非爲之者不力也壬申春大府檄各州縣採訪修志以備編纂通志之用檄至大懼見聞寡陋不稱委任爰與邑進士王莘田時任孝廉彭階平運章周乙生道昌玉山廷琮蔣悅亭宗悌等商確從事邑故明經楊立广端淹雅士也蒐羅散佚裒然成帙其外孫明經李芷泉世方幼習聽聞頗識大概迺相與就立广子孫購得遺稿付芷泉採輯益以新採所得沿類編之藁成余與莘田諸君子互校訂焉以

是年二月始事四閱月而告竣共爲卷五十有二注跡湮沈
知多闕漏然刪蕪舉要較舊志十增六七云時嘉慶十有七
年歲次壬申季夏月署宜賓縣事崇仁劉元熙題并書

原序

康熙二十五年

兼攝敘州府事

何源濬

撰

聖人之治無遠弗周使分猷者不以朝廊萬里而不存夙
夜匪懈之心必自一人之德足以厚臣隣而策馭鼓舞靡
敢辭勞辭賤志交孚而效易奏也此可易得哉濬自康熙
辛酉蒞馬湖爾時蜀方定兵未戢民未也復也捋荼從事
稱貸給牛種稍稍安宅既而有勘木之役勉爲措置民忘
其勞因備陳木不能出之故空耗帑金無濟於用之故遺
黎無幾難堪困累之故詳請者再若山川道里習俗風謠
故事新聞無不熟於胸次隨奉

部文蒐採佚書欲得明末人政之詳遂裒集湖志無復湮

淪之感甫納還監司篆又兼敘守篆幸蒙

當宁洞知民瘼停運楠木而諸廢典次第可興矣述新編以頌
皇仁彙全書以詔後世亟纂敘志乃其時矣宜寶爲敘首邑在
所先矣

至尊不以蜀爲遠而斂明聰且

鑒及纖毫庇我臣民不啻鞠之育之而登之衽席也敢以

至尊爲遠而不殫忠謀以敷

大德廣傳聞以襄

文治哉屬宜令平君廷鼎博求斷簡延致醇儒俾天時人事

灼然可知戶不滿千多山少田今尙蓁蕪意者廣招徠乎

學道貴有傳秀民不乏而教率未嚴雖聞誦讀未第間與
意者勤輔翼乎天格其忠斯神享其祀星辰定位雨暘以
時今之治猶古之治也宜雖凋瘵未起由今滋息還民於
淳富庶易臻而昇平以久也故首序及之

原序

康熙二十五年

邑令

平廷鼎

撰


嘗稽古籍蜀爲梁州地迤南敘郡山水國也光靈誕異每生一往之情石田先生有詞望秦川千里翹翹以其不易至也迺自明之末造其地阻兵已亥耆定以來將三十載中有土寇盜城之變癸丑淪陷庚申恢復自茲

一統光華之治煥然一新而耳目皆豁鼎於壬戌冬受任茲土閱今四稔雖無善政及民而中野安宅人物無殃蓋

朝廷福祐也遠臣藉以無疚焉惕然思之民少無逋稅世平無邊警境靜庭虛援琴而歌雖仕也猶隱焉可樂也民不加多地不加闢則又不敢弛諸懷矣免採楠株而民間勞

費以省幸也民力猶窘未躋豐亨則又不敢釋於慮矣撫
江山之勝吊古舒懷彬彬人士藹焉禮讓長嘯既醉樂矣
四境之內利不盡導害不盡捐則又不敢無所思矣鼎不
遺傳舍之故去此爲愉日啖蔬泊如安之辛勩弗居毀譽
弗計即或量移之日亦望并州爲故鄉而不忍忽然也已
頃奉部檄蒐羅散佚吾師郡伯何公學醇政卓人士熏心
勉闔屬以共舉志事志成垂爲不朽公之膏澤翔洽既溥
而著說文章又足以壽無窮也於是延耆宿拾殘編新舊
聞見胥載無遺分野既定更求勝蹟川流山峙以壯金湯
且令廉節忠孝莫或湮淪天時人事有感斯應悉於是乎

揆之是編也非無益於人倫也鼎竊以爲愜所願矣如從
混濛中闢閭井也茫昧旣開當漸趨文明也



宜賓縣志

凡例

一縣志志一縣也是年奉檄編纂凡事關本府者飭附郭首縣代爲詳叙故自建置沿革以至政績人物各卷皆先府後縣以次開列體例並不紊淆

一人物志卷除事業文章卓卓可紀外其砥礪名節頗有關係爲衆論所推服者即爲收入以善在一鄉表而傳之亦資勸導未忍概行泯沒

一藝文志卷名公著作固當傳誦間有詞義平淺體裁未協亦爲收存以其有關往蹟興沉及人倫風化是書意專紀載非

詩文選也義各有當不妨並列

一各志中有於舊省志府志改正訛舛處悉本楊立菴遺彙裁定並非故立異同

一各卷中有紀載未備及數字空白處俱因舊志與府縣案卷殘缺無可查補用闕所疑